

# Il mas-chalch da Sent



Publicaziuns officialas. Cumpara segund bsögn.

2009/2011

no. 48                    7554 Sent, 3 november 2011 / cl

## Radunanza cumünala

La radunanza es gnüda fixada sün **marcurdi, 16 november 2011, a las 20.15**, in chasa cumünala.

### Tractandas:

1. Protocol da la radunanza cumünala dals 1. settember e dals 24 october 2011
2. Ameglieraziun generala – 20avla ed ultima etappa
  - Preschantaziun ed infuormaziun (pres. da l'ameglieraziun Men Luppi)
    - Nouva punt a Soblantin
    - Sanaziun via Battaglia-Plattas Sura e Plan da Porchs-Plattas Sura
    - Vial per la prada da la Foppa
    - Diversas complettaziuns dal proget da sauaziun
    - Electrificaziun da la stalla da la fam. A. e N. Buchli
  - Credit brüt frs. 675'000.- (cuosts da fabrica)
  - Subvenziuns chantunalas e federalas 82.6%
  - Credit net frs. 117'450.- (cuosts restants per l'ameglieraziun)
  - Dumondas e discussiun
  - Decisiun da la radunanza
3. Ledscha davart l'organisaziun in cas da catastrofas
  - Preschantaziun ed infuormaziun (manader tecnic Jon-Curdin Felix)
  - Dumondas e discussiun
  - Proposta a man da la cumünanza d'urna
4. Varia

## Il Cussagl cumünal

### Transit d'inviern in Val Sinestra

A regard il transit d'inviern in Val Sinestra vain praticchè sco d'ürant ils ons passats, in rondond attent sül scumond da transit dals 27 december 1978 dal Cussagl cumünal e sül decret dal Departamaint da güstizia e pulizia chantunal dals 1. favrer 1979.

### Scumond

Dals 1. november fin als 30 avrigl esa scumandà da transir cun veiculs a motor sülla via Sent – Sinestra. Il scumond vala davent da l'ur dal god Vaschnuogls/Vita-Parcours fin pro'l Kurhaus Val Sinestra. Surpassamaints da quist scumond vegnan chastiat in basa als artichels 20 e 30 da la ledscha stradala. Quist scumond es gnü publichà i'l Fögl uffizial dal chantun Grischun dals 16 favrer 1979.

- Il segnal no. 2.01 "Scumond general per trafic cun veiculs a motor" es plazzà a l'ur dal god.
- Avant la Val Vallatscha es impü montada üna barriera.
- Üna barriera es a l'ur dal god.
- In cas da privel da lavinas sun da resguardar las directivas e masüras dal servezzan da lavinas dal cumün da Sent.

Per traffichar faja dabsögn d'ün permiss special dal cumün. **(La vignetta da vias champestras dal cumün da Sent nu vaglia per transir in Val Sinestra)**. I vain montada suot il scumond general üna tabla "exclus cun permiss special dal Cumün". Permiss specials tschüffan be personas chi han üna incumbenza i'l hotel Val Sinestra. Tuot ils transports dals giasts davent da Sent ston gnir surtuts da l'hotel. Surpassamaints dal **scumond general** vegnan chastiat.

## Il Cussagl cumünal

## **Avis a reg. allontanar saivs electricas**

Tenor art. 32 da l'orden champester ston tuottas saivs electricas chi sun gnüdas fattas sün terrain privat e cumünal gnir allontanadas d'ürant il temp d'inviern. Our da quel motiv sun quellas da **levar subit chi nu vegnan plü dovradas per quist on.**

Sch'inchün nu vess da seguir a quist appell, vegnan levadas las saivs da cumün oura a cuosts da quel chi ha invlidà d'allontanar la saiv. **Attenziun:** Quist avis vala eir per alps e pas-chs! Eventuals dons chi subaintran van a charg da quel chi nun ha levà la saiv! Fich privlus sun pels skiunzs filfiers chi vegnan be miss giò per terra. Per plaschair allontanar eir quels.

**Il schef da god, pas-ch e pauraia**

## **Deponia la Fuorcha**

A partir da subit es müdà oura il maschlöss da la barriera. Quels chi han amo clav dal maschlöss vegl vegnan giavüscharts da restituir la clav in büro cumünal. Las clav novas as po retrar in büro cumünal per ün temp limità da ca. 4 dis in pajond il deposit.

**L'administraziun cumünala**

## **Cumün da Sent**

Nus tscherchain pel on da scoula 2012 / 2013

**üna magistra / ün magister culla qualificaziun per instruir Inglais in scoula primara**

pensum 2 lecziuns / eivna  
cumanzamaint 20.8.2012

Nus giavüschain:

- qualitats pedagogicas e cumpetenzas regard l'instrucziun
- persunalitats ingaschadas e motivadas

Nus spordschain:

- ün interessant lavur in ün gremi pitschen
- ün lö da lavur attractiv in ün cumün cun diversas societats culturalas e da sport
- paja tenor uorden chantunal

Annunzchas in scrit sun d' inoltrar fin als **15 november 2011** a Jon Cantieni, pres. dal cussagl da scoula, 7554 Sent, tel. 079 655 32 07, [cantienijon@bluewin.ch](mailto:cantienijon@bluewin.ch).

**Il Cussagl da scoula**

## **Di da refuorma e di da la schoppa: 6 november 2011**

11.00 predgia (rumantsch)

12.00 gianatar cumünaivel in chasa Misoc in collavuraziun culs confirmands e preparands.

L'entrada dal di da la scoppa va a favur dad Amnesty international.

Per realisar quist arrandschamaint ed eir per otras occasiuns a favur da la cumünanza tscherchain nus agüdontas ed agüdents. Chi chi ha interess, vögla e peda po s'annunzchar pro Barbla Buchli, tel. 081 285 13 53 o 081 864 02 78. Grazcha fich per Vossa bainvuglientscha

**Corporaziun evangelica**

## **Chantar insembel / Chantar da cour**

Chi chanta jent üna jada l'eivna? Chanzuns sacralas per l'orma e per star in cumpagnia e forsa per imbellir üna jada ün cult divin.

A partir da subit fin a Nadal chantaina **mincha marcurdi saira a las 20.00** in chasa cumünala.

Infuormaziuns ed annunzchas:

Esther Reinalter, tel. 081 862 23 29

Erica Clalüna, tel. 081 864 07 59

opür pro la pravenda, tel. 081 864 87 28

**Corporaziun evangelica**

## Püschain da duonnas



**Tema: „Cur cha conumans sun in led – Survgnir curaschi per ün deport adattà cun conumans chi sun in led”**

In sonda, als 19 november 2011 da las 8.30 fin las 11.00 vain organisà fingià per la 9avla jada il famus püschain da duonnas illa sala polivalenta da la Chasa Puntota (dmura d’attempats) a Scuol. L’inscunter cumainza cun ün stupend büfè da püschain accumpagnà da musica. In seguit referischa duonna Susanna Freiburghaus sur dal tema manzunà aint il

titul. Susanna Freiburghaus abita a Thunstetten BE, es maridada, ha trais uffants creschüts ed ün figl ch’id es mort d’ün decess dandet dal cour. Ella es sour d’uffants, lavura uossa il sector fliamaint e chüra ed ha fini giò sia scoulaziun da cussagliaziun ICL. Susanna Freiburghaus s’ingascha illa lavur per conjugals sco eir illa lavur pastoral. Led po tocker a minchün. Cur chi’s sto tour cumgià per adüna d’ün uman, d’ün adüs o d’alch cuntschiant ed amà, as müda la vita dals pertocs suvent d’ün mumaint a tschel. La referenta declera che cha led es, co cha’l led as svilupa e che chi fa bain als pertocs. Ella muossa a man d’exaimpels las differentas fasas dal led e dà blers buns tips per agüd e cussagls da deport in connex cun conumans chi sun in led. Il referat nu tschercha respostas a regard il sen dal led, ma el prova da muossar via cha eir i’l led daja spranza e cha’l led po insacura far lö a nouv dalet.

A quist’occurenza as chattan duonnas da tuot las etas. Pels uffants es organisà üna canorta. Il püschain vain organisà da differentas persunas our da las baselgias refuormadas, catolicas e libras. Annunzchas fin il plü tard als 16 november 2011 (frs. 18.- per persuna) piglia incunter tel. 081 858 59 64 / 076 472 40 73 (Jolanda Thanei)

**Società dal püschain da duonnas**

## Reavertüra – Sport Champatsch

La butia Sport Champatsch es darcheu averta davent dals:

29 october 2011 da las 9.00 – 11.00 e da las 15.00 – 17.00,  
dumengia serrà.

A partir dals 10 december 2011 da las 8.00 – 12.00 e da las 15.00 – 18.00  
dumengia 8.30 – 10.00 e da las 16.00 – 18.00

No ans allegrain sün vossa visita.

**Team Sport Champatsch**

## Da vender a Sent

Terrain agricul , ca. 10'000 m2, a la megladra offerta  
Tel. 081 354 51 84

## Acziun da birnel

In collavuraziun cul uffizi da provedimaint vain organisà eir quist on ün’acziun da birnel. L’acziun po gnir fatta be scha las postaziuns da birnel surpassan la limita prescritta dad 80 kg. Scha quai nu vess d’esser il cas, ston tuot las postaziuns inoltradas gnir annulladas.

Postaziuns cul fögl suotvart pon gnir büttadas aint illa chartera dal Cumün pro l’entrada dal büro cumünal fin **venderdi, 11 november 2011.**

## Uffizi da provedimaint

**Tagliar**

**Fögl da postaziun:** Il suotscrit posta quattras:

..... chartun(s) = 15 dispensers	à 250 gr	birnel =	<b>fr. 63.00</b>
..... chartun(s) = 12 vaiders	à 1 kg	birnel =	<b>fr. 127.20</b>
..... sadella(s)	à 5 kg	birnel =	<b>fr. 46.00</b>
..... sadella(s)	à 12,5 kg	birnel =	<b>fr. 105.00</b>

tuot ils predschs incl. IPV + transport

Telefon:..... Nom e prenom:.....

# **Infuormaziuns da la cumischiun d'energia Sent**

## **Che vuol dir esser 'cità d'energia'?**

Il label 'cità d'energia' demuossa, cha ün cumün s'ha occupà intensivmaing cun sia situaziun d'energia ed ha la voluntà d'ameglrar tala continuantamaing. Il label vain surdat a man dad ün'analisi dal mumaint. Per Sent es quai capità i'l mais gün 2011.

Cun avair il label 'cità d'energia' nun as lia il cumün in ingün möd vi da ledschas o prescripziuns. L'organisaziun 'cità d'energia' fa però mincha 4 ons ün'examinaziun e sch'ün cumün nun ha fat d'ürant quel temp ingün progress a regard la situaziun e la politica d'energia, schi nu vain plü arcugnuschü il status da 'cità d'energia'.

l' temp dad hoz ha la generalità – vuol dir eir il cumün – l'incumbensa da pensar al futur e garantir qualità da vita eir a las prossmas generaziuns. La cumischiun d'energia prouva da tegner suot ögl l'aspet da l'energia in cumün e dad intimar al cussagl da cumün da far üna politica a moda d'üravla. Scha la populaziun da Sent vuol quai propi, po ella decider s'vess sur da masüras cun acceptar o refüsar progets e credits.

Invers giasts ed indigens, uffizis ed instituziuns, partenaris turistics ed economics demuossa il titel da 'cità d'energia', cha Sent es ün cumün chi pensa a l'avegnir. Nus eschan persvas cha quai es hozindi eir üna buna reclama pel cumün.

## **Che esa gnü fat fin uossa?**

In conex culla città d'energia ha la cumischiun propuonü al cussagl cumünal seguaints progets ed amegldramaints chi sun gnüts lantschats d'ürant ils ultims 2 ons:

- sustegn finanziel per analisis d'energia da stabilimaints
- registraziun sistemática dal consüm d'energia dals stabilimaints cumünals
- contribuziun vi da cartas da l'on e dal mais per l'auto da posta Sent-Scuol
- sustegn d'infuormaziun per progets fotovoltaics
- infuormaziun davart il consüm da l'on avant sül quint da forz'eletrica (per congualar)
- registraziun dals systems da s-chodamaint in cumün per pudair tscherchar sinergias in cas da sanaziuns e renovaziuns da stabilimaints

L'implant fotovoltaic sül tet dal lavuratori cumünal in Palüzot es ün dals progets plü gronds cha'l cumün da Sent ha relisà s'vess a regard la tematica d'energia.

## **Co vaja inavant?**

L'instituziun 'cità d'energia' farà dal 2015 la prossm'examinaziun e deciderà scha Sent ha fat progress a regard la politica d'energia e sch'el as po nomnar inavant 'cità d'energia'.

Independent da quai less la cumischiun d'energia accompagnar progets, planisaziuns e la politica cumünala per portar ideas a regard spargnar energia. Las soluziuns dessan esser radschunaivlas ed a bön da cumün, ma pensond eir a nos uffants ed abiadis.

La sanaziun da la chasa da scoula es ün proget ch'id es in planisaziun.

Otras ideas sun: ün sistem da s-chodamaint cumünaivel cun energia regenerabla per la chasa Misoc, baselgia e contuorns, amegldramaint da l'ingluminaziun publica a regard tecnologia ed uraris, promoziun da 'tets fotovoltaics', implant regiunal da biogas, e.o.p.

La cumischiun d'energia less eir sensibilisar a la populaziun, ingio cha mincha singul po contribuir alch per spargnar energia. Cun infuormaziuns i'l mas-chalch vegnan preschantats da temp in temp differentes temas.

Per dumondas, intimaziuns o collavuraziuns pon personas interessadas jent contactar ils commembers da la cumischiun d'energia (Men Caviezel, Jon Carl Rauch, Andri Poo).

**Cumischiun d'energia**